

漢魏六朝百三家集

齊

譙宣城

第六十冊

EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5

V. 60

增定集

謝宣城集

謝宣城集題詞

李青蓮論詩目無往古惟于謝玄暉
三四稱服泛月登樓篇詠數見至欲
攜之上華山問青天余讀青蓮五言
詩情文駿發亦有似玄暉者知其興
歎難再誠心儀之非臨風空憶也梁

武帝絕重謝詩云三日不讀卽覺口
臭簡文與湘東書推爲文章冠冕述
作楷模劉孝綽日置几案沈休文每
稱未有其見貴當時又復如是今反
覆誦之益信古人知言雖漸啟唐風
微遜康樂要已高步諸謝矣隋王賞

愛晤對不舍長史間之殊痛離割集
中文字亦惟文學辭箋西府贈詩兩
篇獨絕蓋中情深者爲言益工也會
稽孔顗粗有才筆未立聲名玄暉愛
其讓表不難折簡手寫齒牙獎成甯
忍重背婦翁生懟寡妻然王公甫誅

二江構害出反之譏頗掛時論嗚呼
康樂宣城其死等爾康樂死于玩世
憐之者猶比于孔北海嵇中散宣城
死于畏禍天下疑其反覆卽與呂布
許攸同類而共笑也一死輕重尤貴
得所哉

婁東張溥題

謝宣城集目錄

賦

酬德賦 有序

思歸賦 有序

遊後園賦

臨楚江賦

七夕賦

擬風賦

高松賦

杜若賦

野鶩賦

有序

表

爲百官勸進齊明帝表

爲明帝讓封宣城公表

爲明帝拜錄尚書表

章

爲宣城公拜章

牋

辭隋王子隆牋

啟

爲王敬則謝會稽太守啟

謝隨王賜左傳啟

謝隨王賜紫梨啟

教

爲錄公拜揚州恩教

爲東海餉諸葛處士教

哀策文

齊敬皇后哀策文

謚冊文

齊明皇帝謚冊文

墓銘

臨海公主墓銘

新安長公主墓銘

海陵王昭文墓銘

鬱林王墓銘

祭文

祭大雷何周二神文

爲隨王東耕文

爲諸姊祭阮夫人文

樂府

齊雩祭歌八首

迎神 八章

世祖武皇帝 三章

青帝 二章

赤帝 三章

黃帝 三章

白帝 三章

黑帝 三章

送神 五章

隨王鼓吹曲十首

元會曲

郊祀曲

鈞天曲

八朝曲

出藩曲

校獵曲

從戎曲

送遠曲

登山曲

泛水曲

江上曲

蒲生行

詠邯鄲才人嫁爲厮養卒婦

鼓吹曲二首同沈右率諸公賦

芳樹

臨高臺

同賦雜曲名

秋竹曲

曲池之水

銅爵臺同謝諮議賦

永明樂十首

有所思同王主簿賦

銅雀悲

玉階怨

金谷聚

王孫遊

詩

侍宴華光殿曲水奉勅爲皇太子作

九章

三日侍宴華光殿曲水宴代人應詔

十章

三日侍宴曲水代人應詔

九章

遊山

遊敬亭山

將遊湘水尋句溪

遊東田

答王世子

答張齊興

暫使下都夜發新林至京邑贈西府同

僚

酬晉安王德元

郡內高齋閒望答呂法曹

在郡卧病呈沈尚書

别王丞僧孺

同羈夜集

新亭渚别范零陵雲

忝役湘州與宣城吏民别

懷故人

始之宣城郡

之宣城郡出新林浦向板橋

休沐重還丹陽道中

京路夜發

晚登三山還望京邑

始出尚書省

直中書省

觀朝雨

宣城郡內登望

冬日晚郡事隙

高齋視事

冬緒羈懷示蕭諮議虞田曹劉江二常

侍

落日悵望

賽敬亭山廟喜雨

賦貧民田

移病還園示親屬

治宅

秋夜講解

春思

秋夜

和何議曹郊遊二首

和劉西曹望海臺

和宋記室省中

和王著作融八公山

和伏武昌登孫權故城

夏始和劉潺陵

新治北窗和何從事

和王主簿季哲怨情

和徐都曹出新亭渚

和劉中書

贈王主簿二首

和蕭中庶直石頭

奉和竟陵王同沈右率過劉先生墓

和王長史臥病

和江丞北戍琅邪城

和沈祭酒行園

奉和隨王殿下十六首

和紀參軍服散得益

和王中丞聞琴

將發石頭上烽火樓

望三湖

送江水曹還遠館

送江兵曹檀主簿朱孝廉還上國

臨溪送別

後齋迴望

與江水曹至于濱戲

荅沈右率諸君餞別

離夜同江丞王常侍作

祀敬亭山廟

出下館

落日同何儀曹煦

夜聽妓二首

詠薔薇

詠蒲

詠兔絲

遊東堂詠桐

雜詠三首

鏡臺

燈

燭

同詠樂器得琴

同詠坐上玩器得烏皮隱几

同詠坐上所見一物得席

詠竹火籠

詠風

詠竹

詠落梅

詠牆北梔子

詠鵲鵲

聯句

阻雪連句遙贈和

還塗臨渚

紀功曹中園

間坐

侍筵西堂落日望鄉

往敬亭路中

祀敬亭山春雨

附錄

本傳

謝宣城集目錄終

謝宣城集卷之全

齊陳郡謝朓玄

明太倉張溥天如閱

賦

酬德賦

右衛沈侯以冠世偉才眷予以國士以建武二年予將南牧見贈五言予時病既以不堪蒞職又不獲復詩四年予忝役朱方又致一首迫東偏寇亂良無暇日其夏還京師且事讌言未遑

篇章之思、沈侯之麗藻天逸、固難以報章、且欲
申之賦頌、得盡其體物之旨、詩不云乎、無言不
酬、無德不報、言旣未敢爲酬、然所報者寡于德
耳、故稱之酬德賦、其辭曰

嗟夫四時游之代序、六龍驚而不息、輕葢靡于
駿奔、玉衡勞于拊翼、嗟歲晏之尠歡、曾陰默以
悽惻、玄武伏於重介、宛虹潛以自匿、覽斯物之
用舍、相羣芳之動植、弔悴軀於華省、理衣簪而
自救、思披文而信道、散忿懣於胸臆、嗟民生之

知用、知莫深于知己、彼知己之爲深、信懷之其
何已、牽弱葛之蔓延、寄陵風於松杞、指曲蓬之
直達、固有憑於原泉、彼排虛與曠實、又相鳴於
林沚、興伐木於友生、詠承筐於君子、矧景行之
在斯、方寄言於同恥、求相仁於積習、寓神心于
名理、惟敦牂之旅歲、實興齊之二六、奉武運之
方昌、覩休風之未淑、龍樓儼而洞開、梁邸煥其
重複、君奉筆於帝儲、我曳裾於皇穆、藉風雲之
化景、申遊好於蘭菊、結德言而爲佩、帶芳猷而

爲服、援雅範以自綏、懿前修之所勗、昔仲宣之
發穎、實中郎之倒屣、及士衡之籍甚、托壯武之
高義、有杞梓之貞心、協丹采之輝被、伊吾人之
陋薄、雖黼藻之何寘、惟風雅之未變、知雲網之
不廓、譬層棟之將傾、必華榱之先落、翳明離以
上賓、屬傳體於纖萼、周二輝而分崩、擠九鼎於
重壑、雖魚鳥之欲安、駭風川而迴薄、微天道之
布新、嗟員首其焉託、予窘迹以多媿、塊離尤而
獨處、君紆組於名邦、貽話言於川渚、悵分手於

東津望徂舟而延佇，慮古今之爲隔。豈山川之
云阻，賴先德之龍興。奉英靈之電舉，事紫泥之
密。勿腰青綬而容與，沾後惠以竭來。竟卒獲其
咲語，我艤舟以命徒。將泊徂於南夏，旣勗予以
炯戒。又引之以風雅，若笙簧之在聽。雖舒憂而
可假，昔疢病於漳濱。思繼歌而莫寫，恩靈降之
未已。奉京粉而作傳，臨邦途之永陌。懷予馬於
騏驎，望平津而出宿。登崇岡而興賦，顧歸轡之
南迴。引行鑣而東驅，何壤才之博侈。申贈辭於

萱樹指代匠而切偲，比治素而引喻，方含毫而
報章，迫坳埃之東驚，釋末位以言歸，忽乘驛以
南赴，連篇章之莫訓，欲寄言於往句，類鍛翮之
難矯，似洞源之不注，意搔搔以杼軸，魂營營而
馳驚，爾腰戟於戎禁，我拂劍於郎闈，願同車以
日夜，城望昏而掩扉，時遊盤以未極，睠落景之
徂輝，苦清顏之倏忽，恡歡賞之多違，排重關而
休告，知南館之有依，驂職門以右轉，僕望路其
如歸，忘清漏之不緩，惜曉露之方晞，聞夫君之

東守地，隱蓄而懷僊，登金華以問道，得石室之
名篇，悟寰中之迫脅，欲輕舉而舍旃，離寵辱於
毀譽，去天伐於腥膻，忽攜手以上征，躋中皇之
修迥，巾帝車之廣軾，棹河舟之輕艇，歷星術之
熠燿，浮天潢之澗溟，機九轉於玉漿，練七明於
神鼎，吹萬化而不喧，度千春之可並，齊天地於
倏忽，安事人間之紆綈哉。

思歸賦

有序

夫鑒之積也無厚，而納窮神之照，心之徑也有

域而懷重淵之深，余少而薄遊身。缺防方思，俄

然萬里晚而自省，諒非一塗。

余菲薄以固陋，受靈恩而不訾。拖銀黃之沃若，剖金符之陸離。舟未濟而河廣，途方遙而馬疲。忽中寢而念厲，魂申旦而九移。昔受教於君子，逢知己之隆盼。被名立之羽儀，沾宦成之藻綬。羗服義而不怠，豈臨岐而喻變。勢方迅於轉圓，理好旋於奔電。援弱葛而能升，踐重岡而不眩。信禔福之非已，寧悔禍其如見。大明廓以高臨，

吹萬忻而同悅，跨神臯之沃衍，奉英藩之膚哲，
承比屋之隆化，踵芳塵之餘烈，懷齷齪之褊心，
無夸毗之誕節，竟伊鬱而不怡，賴遐討於先哲，
紛吾生之遊蕩，彌一紀而歷茲，自下車於江海，
涉青春於是時，睠崇岡而引領，望大厦而長思，
雖曲街之委陋，猶寤寐而見之，况神交而通夢，
眇河漢於佳期，爾乃眷言薄暮，南眺悠然，方整
歸轡，願受一廬，考華城之直陌，相洛浦之廻阡，
連飛夢於故友，接閒館以懷僊，臨南塲以藝藿，

寄北地而采蓮，睇微英之霍霍。望水葉之田田，
乃翦山木不日爲功，非輪非奩，去斲去礪，夜索
綯而繞繞。旦乘屋而芄芄，竹櫺崎嶇而經北繩，
閑窈窕以臨東，布茵蕭於踈櫺，織莢亂於迴櫳。
于是籬插芳槿，門拂長楊，園桃春發，窗竹夏涼。
晨露晞而草馥，微風起而樹香，無芳菲以襲予，
空旖旎於都房。恒離居以歲月，庸銷落而徒傷。
我聞時命有殖，無遷徵事或在，求理未甄，譬豐
草之區別，隨霜露而夭延。背萱鮮於堂北，尚幽

幽而未捐苟外物以能惑亦在應而無騫况朝霞之采可嚙瓊屏之飾方宣養以虛白之氣悟以無生之篇豈加璧之贈可動執珪之位能纏歸來薄暮聊以永年

遊後園賦

積芳兮選木幽蘭兮翠竹上蕪蕪兮蔭景下田田兮被谷左蕙畹兮彌望右芝原兮寫目山霞起而削成水積明以經復於是敞風闥之藹藹聳雲館之迢迢周步檐以升降對玉堂之沈寥

追夏德之方暮，望秋清之始飈。藉宴私而遊衍，
時寤語而逍遙。爾乃日棲榆柳，霞照夕陽。孤蟬
已散，去鳥成行。惠氣湛兮帷殿肅，清陰起兮池
館涼。陳象設兮以玉填，紛蘭籍兮咀桂漿。仰微
塵兮美無度，奉英軌兮式如璋。藉高文兮清談，
預含毫兮握芳。則觀海兮爲富，乃游聖兮知方。

臨楚江賦

爰自山南，薄暮江潭。滔滔積水，裊裊霜嵐。憂與
憂兮竟無際，客之行兮歲已嚴。爾乃雲沉山岫，

風動中川，馳波鬱素。駭浪浮天，明沙宿莽。石路相懸，於是霧隱行鴈，霜眇虛林。迢迢落景，萬里生陰。冽攢笳兮極浦，弭蘭鷁兮江潯。奉玉樽之未暮，飡勝賞之芳音。願希光兮秋月，庶永照於遺簪。

七夕賦

奉護軍
命作

金祇司矩，火曜方流。素鍾登御，夷律鳴秋。朱光既夕，涼雲始浮。盈多露之藹藹，升明月之悠悠。步廣階而延睠，屬天媛之淹留。嗟斯靈之淑景，

招好仇於服箱、邁姮娥而擢質、凌瑤華而擅芳、
厭白玉以爲飾、霏丹霞而爲裳、迴龍駕之容裔、
亂鳳筦之淒鏘、騰燭光於西極、命二妃於瀟湘、
軼帝車而捐玦、凌天津而上翔、悵漢渚之夕漲、
忻河廣之旣梁、臨瑤席而宴語、綿含睇而蛾揚、
嗟蘭夜之難永、泣會促而怨長、忌纖阿之方駕、
吝長庚之末光、撫鳴琴而修怳、浩安歌而自傷、
歌曰、清絃愴兮桂觴酬、雲幄靜兮香風浮、龍鑣
蹀兮玉鑾整、睠星河兮不可留、分雙袂之一斷、

何四氣之可周，斯乃嚮像恍惚，彷彿幽曖耳之
無聞，目之無續，故鐘鼓聞而延予，隱白日沉而
季後對，豈形氣之所求，亦理將其如昧，君王壯
思風飛，冲情雲上，顧楚詩而縱轡，瞻蘭書而競
爽，實研精之多暇，聊餘日之駘蕩，賦幽靈以去
惑，排視聽而玄往，哂陽雲於荊夢，賦洛篇於陳
想，乃澄心而閑邪，庶綢繆於茲賞。

擬風賦

奉司徒
敎作

起日域而搖落，集桂宮而送清，開翠帳之影藹，

響行珮之輕鳴、揚淮南之妙舞、發齊后之妍聲、
下鴻池而蓮散、上雀臺而雲生、至於新虹明歲、
高月照秋、睟儀乃豫、冲想雲浮、鄒馬之賓咸至、
申穆之醴已酬、朝役登樓之詠、夕引小山之謳、
厭朱邸之沉邃、思輕舉而遠遊、驕驕之馬魚躍、
飄鑒車而水流、此乃大王之盛風也、若夫子雲
寂寞、叔夜高張、煙霞潤色、荃萸結芳、出礪幽而
泉冽、入山戶而松涼、眇神玉於邱壑、獨起遠於
孤觴、斯則幽人之風也、

高松賦

奉竟陵王敎作

閱品物於幽記，訪叢育於祕經。巡汜林之彌望，識斯松之最靈。提於巖以羣茂，臨於水而宗生。豈榆柳之比性，指萁椿而等齡。若夫修榦垂蔭，喬柯飛穎。望肅肅而旣閒，卽微微而方靜。懷風陰而送聲，當月露而留影。旣芊眠於廣隰，亦迢遞於孤嶺。集九僊之羽儀，棲五鳳之光景。固總木之爲選，貫山川而自永。爾乃青春受謝，雲物含明。江臯綠草暖然已平，紛弱葉而疑照。競新

藻而抽英，陵翠山其如剪。施懸蘿而共輕，至於
星迴窮紀，沙鴈相飛。同雲泱其無色，陽光沉而
戒暉。卷風颺之歛吸，積霰雪之嚴霏。豈彫貞於
歲暮，不受令於霜威。若乃體同羈制，質兼上才。
夏書稱其岱畎，周篇咏其徂徠。乃屈已以弘用，
構大壯於雲臺。幸爲玩於君子，留神心而顧懷。
君王乃徙讌蘭室，解佩明椒。搴幽蘭於夕陰，詠
聳榦於琴朝。陵高邱以致思，御風景而逍遙。夷
輶冕之隆貴，懷滄陽之寂寥。邈道勝於千禩，蘊

神理而自超，夫江海之爲大，實涓澮之所歸，瞻
衡恒之峻極，不讓壤於塵微，嗟孤陋之無取，幸
聞道於清徽，理弱羽於九萬，愧不能兮奮飛。

杜若賦

奉隋王敎
於坐獻

馮瑤圃而宣游，臨水木而延伫，柳含色於遠岸，
泉鏡流於枉渚，蔭綠竹以淹留，藉幽蘭而容與，
覽茲榮之悅茂，紛爲芳於清籟，觀夫結根擢色，
發曜垂英，緣春巒以纖布，蔭涼潭而影清，景奕
奕以四照，枝靡靡而葉傾，冒霜蹊以獨蒨，當春

郊而逕平，牽汀洲以企予，懷石泉於幽情，嗟中
巖之纖草，厠金芝於芳叢，夕舒榮於潯露，旦發
彩於春風，承義陽之光景，庶無悲於轉蓬。

野鷺賦

有序

有門人斃一野鷺，因以爲獻，予時命以登俎，用
待賓客，客有愛其羽毛，請予爲賦，其詞曰

夫何羅人之伎巧，薦江海之逸禽，落摩天之迅
羽，絕歸飛之好音，碎文錦之丹臆，裂雕綺之翠
襟，孤雛驚以靡翼，饑雌呌而莫尋，越滄流以遠

致乃交畱以兼金因闍寺以傳請排邃戶以重
深貴敷衽以取愛願登俎以甘心

謗宣城集

卷全

表

爲百官勸進齊明帝表

臣聞時乘在御，必待先天之業，神化爲皇，乃叶
應期之運，况復湯孫有緒，纂堯惟德，舊邦佇新，
復禹歸社，大齊之權輿寶曆，孕育前古，昭假四
海，克酬三靈，而嗣命疾威，蕃鄙叛渙，委裘御寓，
燹鼎如忽，陛下文思體道，徇齊作聖，翦應龍於
冀州，戮長蛇於沮水，榮光之瑞昭回，延喜之寶
潤色，天睠爰發，人謀咸贊，伏願陛下仰答靈祇，

弘宣景命，誕受多方，奄宅萬國。

爲明帝讓封宣城公表

如其懸旌，灞漦刷馬，伊穀灑酒，望屬車之塵，整
笏侍升平之禮。陛下訐謨立覽，欽若宏圖，鑒臣
匪躬，其申彝訓。雖量能之請，近遂微躬，則弘長
之風，足軌來世。

爲明帝拜錄尚書表

升降王階，拜揚休命，六轡在手，千里何偕。司會
天官之統，尚書百僚之本，弘之則庶績惟凝，贊

之則葵倫斯斲修身踐言本慙五美果行育德
未階六正妄屬負圖之寄多謝五仁之績操檣
檣於龍津荷梓梁於雲構無以輔位明堂遺像
麟閣

說宣坊集

卷全

章

爲宣城公拜章

惟天爲大，日星度其象，謂地蓋厚，河岳宣其氣，
斯冕旒所以貞觀，袞職所以代終，慙下穆而上
尊，豈南征而北怨，何以克詠九歌，載宣七德，銘
彼旂常，勒斯鐘鼎。

謝宣城集

登南岳詩

登南岳詩

登南岳詩

謝宣城集

章

牋

辭隋王子隆牋

故吏文學謝朓死罪死罪卽日被尚書召以朓
補中軍新安王記室叅軍。朓聞潢汙之水。願朝
宗而每竭。驚蹇之乘。希沃若而中疲。何則。皐壤
搖落。對之惆悵。岐路東西。或以鳴悵。況乃服義
徒擁。歸志莫從。邈若墜雨。翩似秋蒂。朓實庸流。
行能無筭。屬天地休明。山川受納。褒采一介。搜
揚小善。故得捨耒場圃。奉筆菟園。東亂三江西。

浮七澤。契濶戎旃。從容讌語。長裾日曳。後乘載
脂。榮立府庭。恩加顏色。沐髮晞陽。未測涯涘。撫
臆論報。早誓肌骨。不悟滄溟。未運波臣。自蕩渤
解。方春旅翮。先謝清切。藩房寂寥。舊葦輕舟。反
溯。弔影獨留。白雲在天。龍門不見。去德茲永。思
德茲深。惟待青江可望。候歸艎於春渚。朱邸方
開。効蓬心於秋實。如其簪履。或存衽席。無改。雖
復身填溝壑。猶望妻子知歸。攬涕告辭。悲來橫
集。不任犬馬之誠。

啟

爲王敬則謝會稽大守啟

臣本布衣，不謀遠大，折衝之勤，不舉燮理之義，何階常恐覆餗是貽，咎徵斯應。陛下繼歷聖統，日月重光，得以桓珪衮服，拜奉歲時，視濯獻牲，鞠躬郊廟，而鴻恩妄假，覆授龜符玉節，邁於雙璜，表東侔於四履，臨邊三事。旣謝張溫，潁川再撫，亦慙黃霸。

謝隨王賜左傳啟

昭晰殺青，近發中汗。恩勸挾策，慈勗下帷。朏未
窺山筍，早惜河籍。業謝專門，說非章句。庶得旣
困而學，括羽瑩其蒙心。家藏賜書，籙金遺其貽
厥。披覽神勝，吟諷知厚。

謝隨王賜紫梨啟

味出靈闕之陰，旨珍玉津之滋。豈徒真定歸美，
大谷慙茲。將恐帝臺妙棠，安期靈棗。不得孤擅，
玉盤獨甘仙席。雖秦君傳器，漢后推飡。望古可
儔於今何答。

教

爲錄公拜揚州恩教

昔召南分陝流甘棠之德、平陽好道深獄市之
寄、吾忝屬負荷、任總侯伯、受餞元戎、作牧中甸、
此地五都雜會、四方是則、而向隅之矜斯積、納
隍之歎猶繁、興念下車、無忘待旦、有齊禮導德、
致之仁壽、弘漏網之寬、申在宥之澤、

爲東海餉諸葛處士教

昔長孫東組、降龍邱之節、文舉北轡、高通德之

稱所以激貪立懦、式揚風範、處士諸葛、璩高風
所漸、結轍前修、豈懷珠被褐、韜玉待價、將幽貞
獨往、不事王侯者耶、聞事親有啜菽之饗、就養
寡藜蒸之給、豈得獨享萬鍾、而忘茲五秉可餉
穀百斛、

哀策文

齊敬皇后哀策文

惟永泰元年秋九月朔日敬皇后梓宮啟自先塋將祔于興安陵其日至尊親奉奠明皇帝乃使兼太尉陳顯達設祖于行宮禮也翠帟舒阜玄堂啟扉俎徹三獻筵卷六衣哀子嗣皇帝懷蜃衛而延首想鷺輅而撫心痛椒塗之先廓哀長信之莫臨身隔兩赴時無二展旋詔左言光敷聖善其辭曰

帝唐遠胄、御龍遙緒、在秦作劉、在漢開楚、肇惟
淑聖、克柔克令、清漢表靈、曾沙膺慶、爰定厥祥、
徽音允穆、光華沼沚、榮曜中谷、敬始絃綖、教先
種稯、睿問川流、神襟蘭郁、先德韜光、君道方被、
于佐求賢、在謁無訛、顧史弘式、陳詩展義、厚下
曰仁、藏往伊智、十亂斯俟、四教罔忒、思媚諸姑、
貽我嬪則、化自公宮、遠被南國、軒曜懷光、素舒
仁德、閔予不祐、慈訓早遄、方年冲藐、懷袖靡依、
家臻寶業、身嗣昌暉、壽宮寂遠、清廟虛歸、嗚呼

哀哉帝遷明命民神胥悅乾景外臨陰儀內缺
空悲故劍徒嗟金穴璋瓚奚獻褱褕罔設嗚呼
哀哉馮相告褻宸駕長往貽厥遠圖末命是獎
懷豐沛之綢繆兮背神京之弘敞陋蒼梧之不
從兮遵鮒隅以同壤嗚呼哀哉陳象設於園寢
兮映輿鉞於松楸望承明而不入兮度清洛而
南游繼池緯於通軌兮接龍帷于造舟迴塘寂
其已暮兮東川澹而不流嗚呼哀哉藉閔宮之
遠烈兮聞纘女之遐慶始協德於蘋蘩兮終配

祀而表命，慕方纏於賜衣兮。哀日隆於撫鏡，思
寒泉之罔極兮。託彤管於遺詠，嗚呼哀哉。

謚冊文

齊明皇帝謚冊文

維永泰元年九月朔日，哀子嗣皇帝諱仰，惟大
行皇帝早棄萬邦，聖烈方遠，式遵一作尊帝世，俾

鬯鴻猷，咸以爲無名以化，則言繁莫宣其道，有
求斯應，則影響庶圖其功，所以永言配命，寄心
宗極，光昭令德，允樹風聲，伏惟大行皇帝合信
四時，齊明日月，創保大於登庸，通神機於受命，
因時以暢，藉九萬而輕舉，天保既定，運四海而

高臨及廼開物成務重維國綱風行草化心往
如神左賢右戚內樂外禮輯五材以教民申三
驅而在宥用能盛德殷薦美善斯畢皇矣之業
既孚蒸哉之道咸備景化方遠厭世在天龜筮
告期遠日無改仰則前王俯詢百辟累德稱睿
允極鴻名謹命某申奉大牢之奠謹上尊謚曰
明皇帝廟號高宗天人允協神其尚饗嗚呼哀
哉

墓銘

臨海公主墓銘

長發有祥，瑤臺乃構。玄鳥歸飛，北音斯奏。聿來
徐土，禎符爰授。帝體靈柯，穠華以秀。飾館東魯，
言歸景族。有敎公宮，無繫車服。旣肅簪珥，亦崇
湯沐。率禮衡門，降情雲屋。彼月斯望，在釣維緡。
瞻須配景，望燭齊神。靈華崑岫，滅采上春。慈纏
雲陛，悲動外姻。鬱彼崇芒，睠然城輦。輜翟按轡，
龍旒徐轉。

新安長公主墓銘

氛氲長發，時惟睿文。誕茲明淑，玉振蘭芬。譽宣女師，德侔高行。肅穆嬪風，優游闡正。撫事成箴，臨圖作鏡。如何冥默，方春委盛。

海陵王昭文墓銘

中樞誕聖，膺厯受命。於穆二祖，天臨海鏡。顯允世宗，溫文著性。三善有聲，四國無競。嗣德方衰，時唯介弟。景祚云及，多難攸啟。載驅軫轄，高闢代邸。庶辟欣欣，威儀濟濟。亦旣負展，言觀帝則。

正位恭已，臨朝淵嘿。虔思寶締，負荷非克。敬順
天人，高遜明德。西光已謝，東旭又涼。龍蠹夕儼，
葆帙晨鏘。風搖草色，日照松光。春秋非我，晚夜
何長。

鬱林王墓銘

綠車旖旎，翠蕤掩映。癸貳戲良，臨祧弛盛。毀德
歸桐，葉尊居鄭。

祭文

祭大雷何周二神文

大過在運、小雅盡缺、瓊鏡日淪、金車未晰、周生
電斷、神謨英冠、正因部奇、風歛雲散、晉德如燬、
功資叶贊、山無猛鷲、時曠忠賢、流王于彘、龜鼎
忽焉、忠肅布衣、君親自然、驅狐上國、斬鯢中川、
紛綸凱入、氛氲配天

爲隨王東耕文

穀躔星景、穡表蜡先、八政奚首、六府茲宣、樊嗟

非國登頌有年一夫或怠望歲誰天

爲諸姊祭阮夫人文

婉婉嬪德幽閑嬪性眇史弘箴陳詩陳詠嘉言
足題清暉可映契闊未幾音塵如昨中景遽傾
芳木先落疇昔交觴享也虛薦帶上先結握中
遺扇迸淚失聲潺湲如霰

樂府

齊雩祭歌八首

南齊書樂志曰建武二年雩祭明堂
謝朓造辭一依謝莊唯世祖四言也

迎神八章

清明暢禮樂新、候龍景、練貞辰、
陽律亢、陰晷伏、耗下土、薦穰稷、
宸儀警、王度乾、嗟雲漢、望昊天、
張盛樂、奏雲儻、集五精、延帝祖、
雩有諷、榮有秩、膏鬯芬、圭瓚瑟、

靈之來，帝闔開，車煜燿，吹徘徊，
停龍輶，徧觀此，凍雨飛，祥雲靡，
壇可臨，奠可歆，對岷社，鑒皇心。

世祖武皇帝 三章

濟哲維祖，長發其武，帝出自震，重光御寓，七德
攸宣，九疇咸敘，靜難刑衡，凝威蠡浦。

昧旦丕承，夕惕刑政，化一車書，德馨粢盛，昭星
夜景，非雲曉慶，衢室成陰，璧水如鏡。

禮充玉帛，樂被匏絃，於鑠在詠，陟配於天，自宮

徂兆靡愛牲牷，我將我享，永祚豐年。

青帝 三章

營翼日，鳥殷宵，凝冰泮，玄蟄昭。

景陽陽，風習習，女夷歌，東皇集。

奠春酒，秉青珪，命田祖，渥群黎。

赤帝 三章

惟此夏德，德恢台，兩龍在，御炎精來。

火景方中，南譌秩，靡草云黃，含桃實。

族雲蓊鬱，溫風扇，興雨祁祁，黍苗遍。

黃帝 三章

稟火自高明，毓金挺剛克。涼燠資成化，群芳載
厚德。

陽季勾萌達，炎徂溽暑融。商暮百工止，歲極凌
陰冲。

泉流疏已清，原隰甸已平。咸言祚惟億，敦民保

齊京

白帝 三章

帝說于兌，執矩固司藏。百川收潦精，景應金方。

嘉樹離披、榆關命賓鳥、夜月如霜、金風方嫋嫋、
商陰肅殺、萬寶咸已邁、勞哉望歲塲、功冀可收

黑帝 三章

白日短、玄夜深、招搖轉、移太陰、霜鐘鳴、冥陵起、
星廻天、月窮紀、

聽嚴風、來不息、望玄雲、黝無色、曾冰冽、積羽幽、
飛雪至、天山側、

關梁閉、方不巡、合國吹、饗蜡賓、統微陽、究終始、
百禮洽、萬祚臻、

送神

五章

敬如在、禮將周、神之駕、不少留、
躍龍鑣、轉金蓋、紛上馳、雲之外、
警七曜、詔八神、排閭闔、渡天津、
有滄興、膚寸積、雨冥冥、又終夕、
俾棲糧、維萬箱、皇情暢、景命昌、

隋王鼓吹曲十首

以下
五言

齊永明八年謝朓奉鎮西隋王敎於荊
州道中作鈞天以上三曲頌帝功校獵

以上三曲

頌藩德

元會曲

一儀啟昌曆、三陽應慶期、珪贄紛成序、鞀譯憬
來思、分階艷組練、充庭羅翠旗、觴流白日下、吹
溢景雲滋、天儀穆藻殿、萬寓壽皇基、

郊祀曲

六宗禋配岳、五時奠甘泉、整蹕遊九闕、清簫開
八埏、鏘鏘玉鑾動、溶溶金障旋、郊宮光已屬、升
柴禮既虔、福響靈之集、南岳固斯年、

鈞天曲

高、宴、顥、天、臺、置、酒、迎、風、觀、笙、鏞、禮、百、神、鍾、石、動、
雲、漢、瑤、堂、琴、瑟、驚、綺、席、舞、衣、散、威、鳳、來、參、差、立、
鶴、起、凌、亂、已、慶、明、庭、樂、詎、慙、南、風、彈、

八朝曲

江、南、佳、麗、地、金、陵、帝、王、州、透、迤、帶、綠、水、迢、遞、起、
朱、樓、飛、甍、夾、馳、道、垂、楊、蔭、御、溝、凝、笳、翼、高、蓋、疊、
鼓、送、華、輶、獻、納、雲、臺、表、功、名、良、可、收、

出藩曲

雲、枝、紫、微、內、分、組、承、明、阿、飛、艤、遡、極、浦、旌、節、去、

關河渺渺蒼山色，沉沉寒水波繞音。巴渝曲簫鼓盛唐歌，夫君邁惟德。江漢仰清和。

校獵曲

凝霜冬十月，殺盛涼飈哀。原澤曠千里，騰騎紛往來。平望煙合，烈火從風迴。殪獸華容浦，張樂荆山臺。虞人昔有諭，明明時戒哉。

從戎曲

選旅辭輶軒，弭節赴河源。日起霜戈照，風迴連騎翻。紅塵朝夜合，黃沙萬里昏。寥戾清笳轉，蕭

條邊馬煩、自勉輟耕願、征役去何言、

送遠曲

壯、梁、辭、歡、宴、南、浦、送、佳、人、方、衢、控、龍、馬、平、路、騁、
朱、輪、瓊、筵、紗、舞、絕、桂、席、羽、觴、陳、白、雲、邱、陵、遠、山、
川、時、未、因、一、爲、清、吹、激、潺、湲、傷、別、巾、

登山曲

天、明、開、秀、嶺、瀾、光、媚、碧、堤、風、盪、飄、鶯、亂、雲、行、芳、
樹、低、暮、春、春、服、美、遊、駕、凌、丹、梯、升、嶠、旣、小、魯、登、
巒、且、悵、齊、王、孫、尚、遊、衍、蕙、草、正、萋、萋、

泛水曲

王露霑翠葉金風鳴素枝罷遊平樂苑泛鷁昆明池旌旗散容裔簫管吹參差日晚厭遵渚採菱贈清漪百年如流水寸心甯共知

江上曲

易陽春草出踟躕日已暮蓮葉尚田田淇水不可渡願子淹桂舟時同千里路千里旣相許桂舟復容與江上可採菱清歌共南楚

蒲生行

蒲生廣湖邊。託身洪波側。春露惠我澤。秋霜縹
我色。根葉從風浪。常恐不永植。攝生各有命。豈
云智與力。安得遊雲上。與爾同羽翼。

詠邯鄲才人嫁爲厮養卒婦

生平宮閣裡。出入侍丹墀。開笥方羅縠。窺鏡比
蛾眉。初、別、意、未、解、去、久、日、生、悲、憔悴不自識。嬌
羞餘故姿。夢中忽彷彿。猶言承燕私。

鼓吹曲二首同沈右率諸公賦

芳樹

早、翫、華、池、陰、復、影、一作鼓、滄、洲、榭、椅、梔、芳、若、斯、歲、
蕤、紛、可、結、霜、下、桂、枝、銷、怨、與、飛、蓬、折、不、厠、王、盤、
滋、誰、憐、終、委、絕、

臨高臺

千、里、常、思、歸、登、臺、臨、綺、翼、纔、見、孤、鳥、還、未、辨、連、
山、極、四、面、動、清、風、朝、衣、起、寒、色、誰、知、倦、遊、者、嗟、
此、故、鄉、憶、

同賦雜曲名

詩爲宣城守檀
秀才諸君同賦

秋竹曲

嬈娟綺窗北，結根未參差。從風旣裊裊，映日頗
離離。欲求棗下吹，別有江南枝。但能凌白雪，貞
心蔭曲池。

曲池之水

緩步遵莓渚，披衿待蕙風。芙蓉舞輕帶，苞筍出
芳叢。浮雲自西北，江海思無窮。鳥去能傳響，見
我綠琴中。

銅爵臺同謝諮議賦

總帷飄井幹，樽酒若平生。鬱鬱西陵樹，詎聞歌。

吹聲芳襟染淚迹。嬋娟空復情。玉座猶寂寞。况乃妾身輕。

永明樂十首

南齊書樂志曰永明樂歌者竟陵王子良與諸文士造奏之人爲十曲。

帝圖開九有。皇風浮四溟。永明一爲樂。咸池無復靈。

民和禮樂富。世清歌頌徽。鴻名軼卷領。稱首邁垂衣。

朱臺鬱相望。青槐分馳道。秋雲湛甘露。春風散

芝草

龍樓日月照，溜館風雲清。
儲光溫似玉，藩度式如瓊。

化洽鯢海君，恩變龍庭長。
西北驚環裘，東南盡龜象。

出車長洲苑，選旅朝夕川。
絡絡結雲騎，奕奕泛戈船。

燕駟遊京洛，趙服麗有輝。
清歌留上客，妙舞送

將歸

寶相薄五禮、玳花開六塵、明祥已玉燭、寶瑞亦金輪、

生茂苾薌性身與佳蕙隆、飛纓入華殿、屣步出重宮、

彩鳳鳴朝陽、立鶴舞清商、瑞此永明曲、千載爲金皇、

有所思同王主簿賦

佳期期未歸、望望下鳴機、徘徊東陌上、月出行人稀、

銅雀悲

落日高城上餘光入總帷
寂寂深松晚甯知琴瑟悲

王階怨

夕殿下珠簾流螢飛復息
長夜縫羅衣思君此何極

金谷聚

渠碗送佳人玉杯邀

玉臺作要

上客車馬一東西別

後思今夕

王孫遊

綠○草○蔓○如○絲○雜○樹○紅○英○發○無○論○君○不○歸○君○歸○芳○
已○歇○

江州
草堂
蘇軾
詩集
卷八
三

詩

侍宴華光殿曲水奉勅爲皇太子作

四言
九章

旁求邃古，逖聽鴻名。太寶曰位，得一爲貞。朱禘
叶社，綠字摘英。升配同貫，進讓殊聲。

大橫將屬，會昌已命。國步中徂，宸居膺慶。璽劍
先傳，龜玉增映。宗堯有緒，復禹無競。

禮行郊社，人神受職。寶效山川，鱗羽變色。玄塞
北靡，丹微南極。浮羲駕風，飛泳登陟。

能官民秀，利建天跼。楊鶉列野，管絳分區。論思

帝則獻納宸樞。麟趾方定。鵜翼誰濡。
西京藹藹。東都濟濟。秋祓濯流。春禋浮醴。初吉
云獻。上陰方啟。昔駕陽潁。今帳雲陛。

嘉樂舊矣。芳宴在斯。載留神矚。有睟天儀。龍精
已映。威仰未移。葉依黃鳥。花落春池。

高殿弘敞。禁林稠密。青磴崛起。丹樓間出。翠葆
隨風。金戈動日。惆悵清管。徘徊輕脰。

灞澹入筵。河淇流昨。海若來往。觴肴汭。歡飫
有終。清光欲暮。輕貂回首。華組徐步。

登賢博望，獻賦清漳。漢貳稱敏，魏兩垂芳。監撫有則，七鬯無方。瞻言守器，永愧元良。

三日侍華光殿曲水宴代人應詔 十章

群分未辨，類聚茲式。天睠休明，且求至德。御繁實簡，制動惟默。官府百王，衣裳萬國。

中葉遭閔，副內多違。悠悠靈貺，爰有適歸。於昭睿后，撫運天飛。凝居中縣，神動外畿。

懸象著明，離光乃位。我有儲德，微猷淵懿。長壽察書龍樓，廻轡重道上庠。行遵儒肆，

朝陽有幹、布葉萋萋、思皇威矣、鵷羽高棲、出馳
先輅、入秉介珪、瞻泰望、井建魯分奎、

求賢每勞、得士方逸、有覺斯順、無文咸秩、萬箱
惟重、百綏載卹、屈草戒諛、階賞紀日、

文教已肅、武節旣馳、榮光可照、合璧如規、載懷
姑射、尚想瑤池、濯龍乃飾、天淵在斯、
作樂順動、實符時義、上春初吉、亦留淵寄、紅樹
巖舒、青莎水被、雕梁虹拖、雲薨鳥跂、

高懸甲帳、周塞黼帷、長筵列陛、激水旋墀、浮醪

聚蟻靈蔡呈姿。河宗躍踢。海介夔跼。

弱腕纖腰。遷延妙舞。秦箏趙瑟。殷勤促柱。降席連綏。稱觴接武。稽首萬年。獻茲多祐。

天地既成。泉流既清。薄暮沾幸。屬奉文明。將標齊配。刻掃秦京。願馳龍漠。飲馬懸旌。

三日侍宴曲水代人應詔

九章

神理內寂。機象外融。遺情汾水。垂冕鴻宮。樹以司牧。匪我求蒙。徒勤日用。誰契立功。

往晦必明。來碩資蹇。於皇克聖。時乘御辯。寶厯

載暉瑤光重踐昭昭舊物熙熙遷善

當宁日昃求衣未明抵璧焚翠銷劍隳城九疇
式序三辟載清虞箴罔闕矇奏傳聲

麗景則春儀方在震重聖積厚金式瓊潤天爵
必諧王臣咸藎譬諸華霍惟邦之鎮

正朔葱瀚冠冕邛越爭長明堂相超魏闕龜蒙
南薦環裘西發巢閣易窺馴庭難狘

上巳惟昔于彼裊流被穢河許張樂春疇旣停
龍駕亦泛鳧舟靈宮備矣無待茲遊

初鸚命曉。朝霞開夜。飾陞道源。廻伊流灞極望。
天淵。曲阻亭榭。閒館巖敞。長廊水架。
金觴搖蕩。玉俎推移。筵浮水豹。席擾雲螭。寥亮
琴瑟。嗷咷埵簎。歡茲廣讌。穆穆天儀。
周道如砥。康衢載直。徒愧玄黃。負恩無力。華輶
徒駕。長纓未飾。相彼失晨。甯忘鼓翼。

遊山

以下
五言

託養因支離。乘閒遂疲蹇。語默良未尋。得喪云
誰辯。幸蒞山水都。復值清冬緬。凌厓必千仞。尋

壑將萬轉，堅嶠旣峻嶒，迴流復宛澶，杳杳雲竇，
深淵淵，石溜淺，俯眺鬱篴簌，還望森栟櫨，荒隩
被歲莎，崩壁帶苔蘚，飈猱呌層巖，鷗鳬戲沙衍，
觸賞聊自觀，卽趣咸已展，經目惜所遇，前路欣
方踐，無言蕙草歇，留垣芳可搴，尚子時未歸，邴
生思自免，永志昔所欽，勝迹今能選，寄言賞心
客，得性良爲善。

遊敬亭山

茲山亘百里，合沓與雲齊，隱淪旣已託，靈異若

然棲上千蔽白日下屬帶迴谿交藤荒且蔓
枝聳復低獨鶴方朝唳飢飢此夜啼淅雲已漫
漫夕雨亦淒淒我行雖紆組兼得尋幽蹊綠源
殊未極歸徑窅如迷要欲追奇趣卽此凌丹梯
皇恩竟已矣茲理庶無睽

將遊湘水尋句溪

旣從陵陽釣挂鱗驂赤螭方尋桂水源
謁帝蒼山垂辰哉且未會乘景弄清漪
瑟汨瀉長淀潺湲赴兩岐輕蘋上靡靡
襍石下離離寒草分花

映戲鮪乘空移。興以暮秋月。清霜落素枝。魚鳥
余方翫。纓綏君自縻。及茲暢懷抱。山川長若斯。

遊東田

戚戚苦無悰。攜手共行樂。尋雲陟累榭。隨山望
菌閣。遠樹瞬阡阡。生煙紛漠漠。魚戲新荷動。鳥
散餘花落。不對芳春酒。還望青山郭。

答王世子

飛雪天山來。飄聚繩櫺外。蒼雲晴九重。北風吹
萬籟。有酒招親朋。思與清顏會。熊席惟爾安。羔

裘豈吾帶公子不垂堂誰肯憐蕭艾

答張齊興

荆山崕百里漢廣流無極北馳星斗正南望朝
雲色川隰同幽快冠冕異今昔子肅兩岐功我
滯三冬職誰知京洛念彷彿昆山側向夕登城
濠潛池隱復直地迫聞遙蟬天長望歸翼清文
忽景麗思泉紛寶飾勿言脩路阻勉子康衢力
曾厓寂且寥歸軫逝言陟

暫使下都夜發新林至京邑贈西府同僚

大○江○流○日○夜○客○心○悲○未○央○徒○念○関○山○近○終○知○返○
路○長○秋○河○曙○耿○耿○寒○渚○夜○蒼○蒼○引○領○見○京○室○宮○
雉○正○相○望○金○波○麗○鳩○鵲○玉○繩○低○建○章○驅○車○鼎○門○
外○思○見○昭○邱○陽○馳○暉○不○可○接○何○况○隔○兩○鄉○風○雲○
有○鳥○路○江○漢○限○無○梁○常○恐○鷹○隼○擊○時○菊○委○嚴○霜○
寄言尉羅者。寥廓已高翔。

酬晉安王德元

梢○梢○枝○早○勁○塗○塗○露○晚○晞○南○中○榮○橘○柚○甯○知○鴻○
鴈○飛○拂○霧○朝○青○閣○日○旰○坐○彤○闈○悵○望○一○途○阻○參○

差百慮。依春草。秋更綠。公子未西歸。誰能久京洛。緇塵染素衣。

郡內高齋閒望答呂法曹

結構何迢遞。曠望極高深。牕中列遠岫。庭際俯喬林。日出衆鳥散。山暝孤猿吟。已有池上酌。復此風中琴。非君美無度。孰爲勞寸心。惠而能好我。問以瑤華音。若遺金門步。見就玉山岑。

在郡臥病呈沈尚書

淮陽股肱守。高卧猶在茲。况復南山曲。何異幽

讀宜切集 二 夕 八
棲時連陰盛農節。簞笠聚東菑。高閣常晝掩。荒
堦少諍辭。珍簞清夏室。輕扇動涼颼。嘉魴聊可
薦。綠蟻方獨持。夏李沈朱實。秋藕折輕絲。良辰
竟何許。夙昔夢佳期。坐嘯徒可積。爲邦歲已暮。
弦歌終莫取。撫枕令自嗤。

別王丞僧孺

首夏實清和。餘春滿郊甸。花樹雜爲錦。月池皎
如練。如何當此時。別離言與宴。留襍已鬱紆。行
舟亦遙衍。非君不見思。所悲思不見。

同羈夜集

積念隔炎涼。驤言始今夕。已對濁尊酒。復此故鄉客。霜月始流砌。寒蛸早吟隙。幸藉京華遊。邊城讌良席。樵采咸共同。荆莎聊可藉。恐君城闕人。安能久松栢。

新亭渚別范零陵雲

洞庭張樂地。瀟湘帝子遊。雲去蒼梧野。水還江漢流。停驂我悵望。輟棹子夷猶。廣平聽方籍。茂陵將見求。心事俱已矣。江上徒離憂。

忝役湘州與宣城吏民別

弱齡倦簪履。薄晚忝華輿。閒沃盡地區。山泉諧
所好。幸遇昌化穆。淳俗罕驚暴。四時從偃息。三
省無侵冒。下車遽暄席。紆服始黔竈。榮辱未遑
敷。德禮何由導。汨徂奉南岳。兼秩典邦號。疲馬
方云驅。鉛刀安可操。遺惠良寂寞。恩靈亦匪報。
桂水日悠悠。結言幸相勞。吐納貽爾和。窮通曷
所蹈。

懷故人

芳洲有杜若，可以贈佳期。望望忽超遠，何由見所思。行行未千里，山川已間之。離居方歲月，故人不在茲。清風動簾夜，孤月照牕時。安得同攜手，酌酒賦新詩。

始之宣城郡

下帷闕章句，高談魏名理。疎散謝公卿，蕭條依掾史。簪髮逢嘉惠，教義承君子。心迹苦未并，憂歡將十祀。幸沾雲雨慶，方轡參多士。振鷺徒追飛，群龍難隸齒。烹鮮止貪兢，共治屬廉耻。伊余

昧損益。何用祇千里。解劍北宮朝。息駕南川涘。
甯希廣平詠。聊慕華陰市。棄置宛洛遊。多謝金
門裏。招招漾輕楫。行行趨巖趾。江海雖未從。山
林於此始。

之宜城郡出新林浦向板橋

江路西南永。歸流東北驚。天際識歸舟。雲中辨
江樹。旅思倦搖搖。孤遊昔已屢。旣歡懷祿情。復
協滄洲趣。囂塵自茲隔。賞心於此遇。雖無玄豹
姿。終隱南山霧。

休沐重還丹陽道中

薄遊第從告。思閒願罷歸。還卽歌賦似。休汝車
騎非。灞池不可別。伊川難重違。汀葭稍靡靡。江
蓼復依依。田鵠遠相呌。沙鴒忽爭飛。雲端楚山
見。林表吳岫微。試與征徒望。鄉淚盡沾衣。賴此
盈樽酌。含景望芳菲。問我勞何事。霑沐仰清徽。
志、狹、輕、軒、冕、恩、甚、戀、閨、闈、歲、華、春、有、酒、初、服、偃、
郊、扉、

京路夜發

詩

擾擾整夜裝、肅肅戒徂兩、曉星正寥落、晨光復
瀼瀼、猶沾餘露團、稍見朝霞上、故鄉邈已覓、山
川脩且廣、文奏方盈前、懷人去心賞、敕躬每踟
躕、瞻恩惟震蕩、行矣倦路長、無由稅歸鞅

晚登三山還望京邑

灞浹望長安、河陽視京縣、白日麗飛甍、參差皆
可見、餘霞散成綺、澄江靜如練、喧鳥覆春洲、雜
英滿芳甸、去矣方滯淫、懷哉罷歡宴、佳期悵何
許、淚下如流霰、有情知望鄉、誰能鬢不變。

始出尚書省

惟昔逢休明。十載朝雲陛。旣通金閨籍。復酌瓊
筵醴。宸景厭昭臨。昏風淪繼體。紛虹亂朝日。濁
河穢清濟。防口猶寬政。餐茶更如薺。英袞暢人
謀。文明固天啟。青精翼紫軼。黃旗映朱邸。還覩
司隸童。復見東都禮。中區咸已泰。輕生諒昭洒。
洗音趨事辭宮闕。載筆陪旌棨。邑里向疎蕪。寒流
自清泚。衰柳尚沈沈。凝露方泥泥。零落悲友朋。
歡娛燕兄弟。旣秉丹石心。甯流素絲涕。因此得

蕭散垂竿深澗底。

直中書省

紫殿肅陰陰、彤庭赫弘敞、風動萬年枝、日華承露掌、玲瓏結綺錢、深沉映朱網、紅藥當階飜、蒼苔依砌上、茲言翔鳳池、鳴佩多清響、信美非吾室、中園思偃仰、朋情以鬱陶、春物方駘蕩、安得凌風翰、聊恣山泉賞

觀朝雨

朔風吹飛雨、蕭條江上來、旣灑百常觀、復集九

成臺空濛如薄霧，散漫似輕埃。平明振衣坐，重
門猶未開。耳目暫無擾，懷古信悠哉。戢翼希驤
首，乘流畏曝鰓。動息無兼遂，岐路多徘徊。方同
戰勝者，去剪北山萊。

宣城郡內登望

借問下車日，匪直望舒圓。寒城一以眺，平楚正
蒼然。山積陵陽阻，溪流春穀泉。威紆距遙甸，巉
崑帶遠天。切切陰風暮，桑柘起寒烟。悵望心已
極，惝恍魂屢遷。結髮倦爲旅，平生早事邊。誰規

鼎食盛甯要狐白鮮方棄汝南諾言稅遼東田
冬日晚郡事隙

案牘時閒暇偶坐觀卉木颯颯滿池荷條條蔭
牕竹簷隙自周流房櫳閒且肅蒼翠望寒山崢
嶸瞰平陸已惕慕歸心復傷千里目風霜旦夕
甚蕙草無芬馥云誰美笙簧孰是厭邁軸願言
稅逸駕臨潭餌秋菊

高齋視事

餘雪映青山寒霧開白日曖曖江村見離離海

樹出披衣就清盥。憑軒方秉筆。列俎歸單味。連
駕止容膝。空爲大國憂。紛詭諒非一。安得掃荒
逕。鎖吾愁與疾。

冬緒羈懷示蕭諮議虞田曹劉江二常侍
去國懷邱園。入遠滯城闕。寒燈耿宵夢。清鏡悲
曉髮。風草不留霜。冰池共如月。寂寞此閒帷。琴
尊任所對。客念坐嬋媛。年華稍菴蔓。夙慕雲澤
遊。共奉荆臺績。一聽春鶯喧。再視秋鴻沒。疲驂
良易返。恩波不可越。誰慕臨淄鼎。常希茂陵渴。

依隱幸自從。求心果蕪昧。方軫歸與願。故山芝
未歇。

落日悵望

昧旦多紛喧。日晏未遑舍。落日餘清陰。高枕東
牕下。寒槐漸如束。秋菊行當把。借問此何時。涼
風懷朔馬。已傷歸慕客。復思離居者。情嗜幸非
多。案牘偏爲寡。旣乏瑯琊政。方憩洛陽社。

賽敬亭山廟喜雨

夕悵懷椒糈。蠲景潔膏薌。登秋雖未獻。望歲仁

年祥潭淵深可厲狹邪車未方朦朧度絕限出
沒見林堂秉玉朝群帝樽桂迎東皇排雲接虬
蓋蔽日下霓裳會舞紛瑤席安歌遶鳳梁百味
芬綺帳四座沾羽觴福被延民澤樂極思故鄉
登山騁歸望原雨晦茫茫胡甯昧千里解佩拂
山莊

賦貧民田

假遇

一作佳譽

非將迎靖共

一作靜拱

延殊慶中歲歷三

臺旬月典邦政曾是共治情敢忘卹貧病將無

詩

富教禮。孰有知方性。敦本抑工商。均業省兼併。
察壤見泉脉。覘星視農正。黍稷緣高殖。穡稼卽
卑盛。舊埒新塍分。青苗白水映。遙樹匝清陰。連
山周遠淨。卽此風雲佳。孤觴聊可命。旣微三載
道。庶藉兩岐詠。俾爾倉廩實。余從谷口鄭。

移病還園示親屬

疲策倦人世。斂性就幽蓬。停琴仁涼月。滅燭聽
歸鴻。涼薰乘暮晰。秋華臨夜空。葉低知露密。崖
斷識雲重。折荷葺寒袂。開鏡眇衰容。海暮騰清

氣河關祕棲冲煙衡時未歇芝蘭去相從

治宅

結宇夕陰街荒幽橫九曲迢遞南川陽迢遞西山足闢館臨秋風敞牕望寒旭風碎池中荷霜翦江南菉旣無東都金且稅東臯粟。

秋夜講解

四緣去誰肇七識習未央沈沈倒營魄苦蔭蹙愁腸琴瑟徒爛漫姱容空滿堂春顏遽幾日秋壘終茫茫孰云濟沈溺假願託津梁惠唱摘泉

湧、妙、演、發、金、相、空、有、定、無、執、實、實、固、相、忘、自、來、
乘、首、夏、及、此、申、暮、霜、雲、物、清、晨、景、衣、巾、引、夕、涼、
風、振、蕉、蓮、裂、露、下、梧、楸、傷、六、龍、且、無、借、三、相、寧、
久、長、何、時、接、靈、應、及、子、同、舟、航、

春思

茹谿發春水，叱山起朝日。蘭色望已同，萍際轉、
如、一、巢、燕、聲、上、下、黃、鳥、弄、儔、匹、邊、郊、阻、遊、衍、故、
人、盈、契、濶、夢、寐、借、假、簧、思、歸、賴、倚、瑟、幽、念、漸、鬱、
陶、山、楹、永、爲、室、

秋夜

秋夜促織鳴，南鄰搗衣急。思君隔九重，夜夜空
佇立。北牕輕幔垂，西戶月光八。何知白露下，坐
視階前濕。誰能長分居，秋盡冬復及。

和何議曹郊遊二首

春心澹容與，挾戈步中林。朝光映紅萼，微風吹
好音。江垂得清賞，山際果幽尋。未嘗遠離別，知
此愜歸心。流沂終靡已，嗟行方至今。

江臯倦遊客，薄暮懷歸者。揚舲浮大川，惆悵至

言上集卷之二
日下霍靡青莎被潺湲石溜瀉寄語持笙簧舒
憂願自假歸途豈難涉翻同江上夏

和劉西曹望海臺

滄波不可望望極與天平。往往孤山映處處春
雲生。差池遠鴈沒颯沓群鳬驚。囂塵及簿領棄
拾出重城臨川徒可羨結網庶時營。

和宋記室省中

落日飛鳥遠憂來不可極。竹樹澄遠陰雲霞成
異色。懷歸欲乘電瞻言思解翼清揚婉禁居秘

此文墨職無歎阻琴樽相從伊水側

和王著作融八公山

二別阻漢坻。雙嶠望河澳。茲嶺復嶢岼。分區奠
淮服。東限瑯琊臺。西距孟諸陸。吁眠起雜樹。檀
欒蔭脩竹。日隱澗疑空。雲聚岫如複。出沒眺樓
雉。遠近送春目。戎州昔亂華。素景淪伊穀。沾危
賴宗袞。微管寄明牧。長蛇固能翦。奔鯨自此曝。
道峻芳塵流。業遙年運倏。平生仰令圖。吁嗟命
不淑。浩蕩別親知。連翩戒征軸。再遠館娃宮。兩

去、河、陽、谷、風、煙、四、時、犯、霜、雨、朝、夜、沐、春、秀、良、已、凋、秋、場、庶、能、築、

和伏武昌登孫權故城

伏曼容爲武昌太守

炎靈遺劒璽。當塗駭龍戰。聖期缺中壤。霸功興
寓縣。鵲起登吳山。鳳翔凌楚甸。衿帶窮巖險。帷
帟盡謀選。北拒溺驂鑣。西龕收組練。江海旣無
波。俯仰流英眄。裘冕類禋郊。十揆崇離殿。釣臺
臨講閤。樊山開廣讌。文物共葳蕤。聲明且蔥蒨。
三光厭分景。書軌欲同薦。參差世祀忽。寂寞市

朝變舞館識餘基。歌梁想遺囀故林。衰木平荒池秋草。徧雄圖。悵若茲。茂宰深遐。睠幽客。滯江臯。從賞乖纓弁。清卮阻獻酬。良書限聞見。幸藉芳音多承風采餘絢。于役倘有期。鄂渚同遊衍。

夏始和劉潺陵

威仰弛蒼郊。龍曜表皇陽。春色卷遙甸。炎光麗近邑。白蘋望已騁。緗荷紛可襲。徒願尺波旋。終憐寸景戢。對窗斜日過。洞幌鮮鱗入。浮雲去欲窮。暮鳥飛相及。柔翰縝芳塵。清源非易揖。廻江

難絕濟。云誰暢伫立。良宰勗夜漁。出入事朝汲。
積羽余旣裳。更賦子盈粒。椅梧何必零。歸來共
棲集。

新治北窗和何從事

國小暇日多。民淳紛務屏。闢牖期清曠。開簾候
風景。泱泱日照溪。團團雲去嶺。岩堯蘭棹峻。駢
闐石路整。池北樹如浮。竹外山猶影。自來彌弦
望。及君臨箕頽。清文蔚且詠。微言超已領。不見
城濠側。思君朝夕頃。迴舟方在辰。何以慰延頸。

和王主簿季哲怨情

掖庭聘絕國。長門失歡宴。相逢詠靡蕪。辭寵悲
團扇。花叢亂數蝶。風簾入雙燕。徒使春帶賒。坐
惜紅粧變。生平一顧重。宿昔千金賤。故人心尚
爾。故人心不見。

和徐都曹出新亭渚

宛洛佳遨遊。春色滿皇州。結軫清郊路。迴瞰蒼
江流。日華川上動。風光草際浮。桃李成蹊徑。桑
榆蔭道周。東都已倣載。言歸望綠疇。

和劉中書

昔余侍君子，歷此遊荆漢。山川隔舊賞，朋僚多
雨散。圖南矯風翮，曾非息短翰。移疾覲新篇，披
衣起淵翫。惆悵懷昔踐，彷彿得殊觀。頽紫共彬
駮，雲錦相凌亂。奔星上未窮，驚雷下將半。迴潮
漬崩樹，輪囷軋傾岸。巖篠或傍翻，石菌蕪脩幹。
澄澄明浦媚，衍衍清風爛。江潭良在目，懷賢興
累歎。歲暮不我期，淹留絕巖畔。

贈王主簿二首

日落窗中坐。紅粧好顏色。舞衣襞未縫。流黃覆
不織。蜻蛉草際飛。遊蜂花上食。一遇長相思。願
寄連翩翼。

清吹要碧玉。調絃命綠珠。輕歌急綺帶。含笑解
羅襦。餘曲詎幾許。高駕且踟躕。徘徊韶景暮。
一作
景暮惟有洛城隅。

和蕭中庶直石頭

九河亘積阻。三嶼鬱旁眺。皇州總地德。回江欸
巖徼。并幹艷蒼林。雲薨蔽層嶠。川霞旦上薄。山

光晚餘照翔集亂歸飛。虹蜺紛引曜。君子奉神
略。瞰迥憑重峭。彈冠已籍甚。升車益英妙。功存
漢冊書。榮並周庭燎。汲疾移偃息。董園倚談笑。
麾旆一悠悠。謙姿光且劭。讌嘉多暇日。興文起
淵調。曰余廁鱗羽。滅景從漁釣。澤渥資投分。逢
迎典待詔。詠沼邈含毫。專城空坐嘯。徒慚皇鑒
揆。終延曲士誚。方追隱淪訣。偶解金丹要。若偶
巫咸招。帝閭良可叫。

奉和竟陵王同沈右率過劉先生墓

嘉樹因枝條，琢玉良可寶。若人陵曲臺，垂帷茂
淵道。善誘宗學原，鳴鐘霽幽抱。仁焉徂宛洛，清
徽夜何早。歲晚結松陰，平原亂秋草。不有至言
揚，終滯西山老。

和王長史臥病

岬岫欵崇崖，派別朝洪河。兎園文雅盛，章臺冠
蓋多。淵襟眷睿岳，燮贊動昨歌。顧影慚駢服，載
筆旅江沱。綈衣分可獻，琴言曖已和。青臯向還
色，春澗視生波。巖垂變好鳥，松上改陳蘿。日與

歲眇邈，歸恨積。

一作稍

蹉跎，願緝吳山杜。寧袂楚

池荷。清風豈孤劬。功遂懷曾阿。勿藥良有暢。荏苒芳未過。幸留清樽味。言藉故田莎。

和江丞北戍琅邪城

春城麗白日，阿閣跨層樓。蒼江忽渺渺，驅馬復悠悠。京洛多塵霧，淮濟未安流。豈不思撫劍，惜哉無輕舟。夫君良自勉，歲暮勿淹留。

和沈祭酒行園

清淮左長薄，荒徑隱高蓬。回潮旦夕上，寒渠左

右通。霜畦紛綺錯。秋町鬱蒙茸。環梨懸已紫。珠
榴折且紅。君有棲心地。伊我歡旣同。何用甘泉
側。玉樹望青蔥。

奉和隨王殿下十六首

高秋夜方靜。神居肅且清。閒階塗廣露。涼宇澄
月陰。嬋娟影池竹。疎蕪散風林。淵情協爽節。詠
言興德音。闇道空已積。千直愧蓬心。

星回夜未艾。洞房凝遠情。雲陰滿池榭。中月懸
高城。喬木含風霧。行鴈飛且鳴。平臺盛文雅。西

園富羣英芳慶良永矣、君王嗣德聲、眷此伊洛、
詠載懷汾水情、顧已非麗則恭惠奉仁明、觀淄
詠已失、慨然愧簪纓、

神心遺魏闕中想、顧汾陽肅景懷辰豫、捐玦剪
山楊、時惟清夏始、雲景曖含芳、月陰洞野色、日

華麗池光草含亭、臯遠霞生川路長、端坐聞鶴
引、靜瑟愴復傷、懷哉泉石思、歌詠鬱瓊相、春塘
多迭駕、言從伊與商、袞職眷英覽、獨善伊何忘

願輟東都遠、弘道侍云梁、

睿心重離析。岐路清江隈。四面寒飈舉。千里白
雲來。川長別管思。地迫翻旗回。還顧昭陽闕。超
遠章華臺。置酒巫山日。爲君停玉杯。

桂樓飛絕限。超遠向江岐。輕寒霽廣甸。微風散
清漪。連連絕鴈舉。渺渺青煙移。嚴城亂芸草。霜
塘凋素枝。氣爽深遙矚。豫永聊停曦。卽已終可
悅。盈尊且若斯。

念深冲照廣。業闡清化立。端儀穆金殿。敷教藻
瓊筵。船湛輕帷靄。磬轉芳風旋。卷轡棲道樹。方

津棹法舫，歸興憑大造，昭塗良易筌。

玄冬寂脩夜，天圍靜且開，亭臯霜氣愴松宇，清風來高琴，時以思幽人，多感懷，幸藉汾陽想，嶺首正徘徊。

愴愴緒風興，祁祁族雲布，嚴氣集高軒，稠陰結寒樹，日月謬論思，朝夕承清豫，徒藉小山文，空揖章臺賦。

蕭景遊清都，脩簪侍蘭室，累榭疎遠風，廣庭麗朝日，穆穆神儀靜，悃悃道言密，一殮繫靈表，無

客科年厯

清房洞已靜。閒風伊夜來。雲生樹陰遠。軒廣月
容開。宴私移燭飲。遊賞藉琴臺。風猷冠淄鄴。祗
爲愧唐枚。

方池含積水。明月流皎鏡。規荷承日滋。影鱗與
風泳。上善叶淵心。止川測動性。幸是方春來。側
點游濠盛。

浮雲西北起。飛來下高堂。合散輕帷表。飄舞桂
臺陽。遙階收委羽。平地如夜光。眷言金玉照。顧

慚蘭蕙芳

炎光缺風雅。宗霸振時淪。龍德待雲霧。令圖方
再晨。歲遠荒城思。霜華宿草陳。英威遽如是。徘徊
岐路人。

分悲玉瑟斷。別渚金樽傾。風入芳帷散。釭華蘭
殿明。想折中園草。共知千里情。行雲故鄉色。贈
此一離聲。

年華豫已滌。夜艾賞方融。新萍時合水。弱草未
勝風。閨幽瑟易響。臺迥月難中。春物廣餘照。蘭

萱佩未窮。

連漪映餘雪。嚴城限深霧。清寒起潺湲。門東風急。
池樹神居望已肅。徘徊舉冲趣。棲歸如遲詠。丘
山不可屢。

和紀參軍服散得益

金液稱九轉。西山歌五色。鍊質乃排雲。濯景終
不測。雲英亦可餌。且駐羲和力。能令長卿臥。暫
故遇真識。

和王中丞聞琴

涼風吹月露、圓景動清陰、蕙風入懷抱、聞君此、
夜、琴、蕭、瑟、滿、林、聽、輕、鳴、響、澗、音、無、爲、澹、容、與、蹉、
跎、江、海、心、

將發石頭上烽火樓

徘徊戀京邑、躑躅躡曾阿、陵高遲關近、眺迥風、
雲、多、荆、吳、阻、山、岫、江、海、含、瀾、波、歸、飛、無、羽、翼、其、
如、離、別、何、

望三湖

積水照頰霞、高臺望歸翼、平原周遠近、連汀見、

紆直、葳蕤向春秀、芸黃共秋色、薄暮傷哉人、嬋媛復何極、

送江水曹還遠館

高館臨荒途、清川帶長陌、上有流思人、懷舊望歸客、塘邊草雜紅、樹際花猶白、日暮有重城、何由盡離席、

送江兵曹檀主簿朱孝廉還上國

方舟泛春渚、攜手趨上京、安知暮歸客、詎憶山中情、香風蓋上發、好鳥葉間鳴、揮袂送君已、獨

此夜琴聲

臨溪送別

悵望南浦時。徙倚北梁步。葉上涼風初。日隱輕
霞暮。荒城迴易陰。秋溪廣難渡。沫泣豈徒然。君
子行多露。

後齋迴望

高軒瞰四野。臨牖眺襟帶。望山白雲裏。望水平
原外。夏木轉成帷。秋荷漸如蓋。輦洛常睠然。搖
心似懸旆。

與江水曹至干濱戲

玉臺云別
江水曹

山中上芳月。故人清樽賞。遠山翠百重。迴流映
千丈。花枝聚如雪。蕪絲散猶網。一作垂藤
散似網別後
能相思。何嗟異封壤。

答沈右率諸君餞別

春夜別清樽。江潭復爲客。歎息東流水。如何故
鄉陌。重樹日芬藍。芳洲轉如積。望望荆臺下。歸
夢相思久。

離夜同江丞王常侍作

詩、宜、坊、集、
玉、繩、隱、高、樹、斜、漢、耿、層、臺、離、堂、華、燭、盡、別、幌、清、
琴、哀、翻、潮、尚、知、限、客、思、耿、難、裁、山、川、不、可、夢、况、
乃、故、人、杯、

祀敬亭山廟

剪、削、兼、太、華、崢、嶸、跨、玄、圃、貝、闕、眊、阿、宮、薜、帷、陰、
網、戶、參、差、時、未、來、徘、徊、望、灋、浦、椒、桴、若、馨、香、無、
絕、傳、終、古、

出下館

麥、候、始、清、和、涼、雨、銷、炎、燠、紅、蓮、搖、弱、荇、丹、藤、繞、

新竹物色盈懷抱，方駕娛耳目。零落旣難留，何
用存華屋。

落日同何儀曹煦

參差複殿影，氛氲綺羅雜。風入天淵池，芰荷搖
復合。遠聽雀聲聚，回望樹陰沓。一賞桂尊前，甯
傷蓬髮颯。

夜聽妓二首

瓊閨釧響聞，瑤席芳塵滿。要取洛陽人，共命江
南管。情多舞態遲，意傾歌弄緩。知君密見親，寸

心傳玉盃

上客光四座。佳麗直千金。挂釵報纓絕。墮珥苔
琴心。蛾眉已共笑。清香復入襟。歡樂夜方靜。翠
帳垂沈沈。

詠薔薇

低枝詎勝葉。輕香幸自通。發萼初攢紫。餘采尚
霏紅。新花對白日。故蕊逐行風。參差不俱曜。誰
肯盼微叢。

詠蒲

離離水上蒲，結水散爲珠。間厠秋菡萏，出入春
鳬雛。初萌實雕俎，暮蕊雜椒塗。所悲塘上曲，遂
鑠黃金軀。

詠兔絲

輕絲旣難理，細縷竟無織。爛漫已萬條，連綿復
一色。安根不可知，縈心終不測。所貴能卷舒，伊
用蓬生直。

遊東堂詠桐

孤桐北牕外，高枝百尺餘。葉生旣婀娜，葉落更

扶疎無華復無實，何以贈離居。裁爲珪與瑞，足可命參墟。

雜詠三首

鏡臺

玲瓏類丹檻，茗亭似玄闕。對鳳懸清冰，垂龍挂明月。照粉拂紅粧，插花理雲髮。玉顏徒自見，常畏君情歇。

燈

發翠斜漢裏，蓄寶宕山峰。抽莖類仙掌，銜光似

燭龍飛蛾再三繞，輕花四五重。孤對相思夕，空照舞衣縫。

燭

杏梁賓未散，桂宮明欲沈。曖色輕帷裏，低光照寶琴。徘徊雲髻影，的皜綺疏金。恨君秋月夜，遺我洞房陰。

同詠樂器得琴

洞庭風雨幹，龍門生死枝。雕刻紛布濩，冲響鬱清卮。春風搖蕙草，秋月滿華池。是時操別鶴，淫

詩集
卷八
淫客淚垂

同詠坐上玩器得烏皮隱几

蟠木生附枝，刻削豈無施。
取則龍文鼎，三趾獻光儀。
勿言素韋潔，白沙尚推移。
曲躬奉微用，聊承終宴疲。

同詠坐上所見一物得席

本生潮汐池，落景照參差。
汀洲蔽杜若，幽渚奪江蘼。
遇君時采擷，玉座奉金卮。
但願羅衣拂，無使素塵彌。

詠竹火籠

庭雪亂如花，井冰粲成玉。因炎入貂袖，懷溫奉芳褥。體密用宜通，文邪性非曲。本自江南墟，嫵媚脩且綠。暫承君王指，請謝陽春旭。

詠風

徘徊發紅萼，葳蕤動綠施。垂楊低復舉，新萍合且離。步檐行袖靡，當戶思襟披。高響飄歌吹，相思子未知。時拂孤鸞鏡，星鬢視參差。

詠竹

牕前一叢竹，青翠獨言奇。
南條交北葉，新筍雜故枝。
月光疎已密，風來起復垂。
青鳬飛不礙，黃口得相窺。
但恨從風籜，根株長別離。

詠落梅

新葉初冉冉，初莖新菲菲。
逢君後園燕，相隨巧笑歸。
親勞君玉指，摘以贈南威。
用持插雲髻，翡翠比光輝。
日暮長零落，君恩不可追。

詠牆北梔子

有美當階樹，霜露未能移。
金蕢發朱采，映日以

離離幸賴夕陽下，餘景及西枝。還思照綠水，君
階無曲池。餘榮未能已，晚實猶見奇。復留傾筐
德，君恩信未貲。

詠鵝鵝

蕙草含初芳，瑤池暖晚色。得廁鴻鸞影，晞光弄
羽翼。

謝宣城集

謝宣城集

謝宣城集

謝宣城集

謝宣城集

謝宣城集

聯句

阻雪連句遙贈和

積雪皓陰池，北風鳴細枝。九達密如繡，何異遠

別離。

謝朓

風庭舞流霰，冰沼結文澍。飲春雖以燠，

欽賢紛若馳。

江秀才

珠英條間響，玉溜檐下垂。杯

酒不相接，寸心良共知。

王融

飛雲亂無緒，結冰

明曲池。雖乖促席讌，白首信勿虧。

王蘭陵僧孺

飄素

瑩簷溜，巖結噎通岐。鐫疊如未澣，况乃限音儀。

謝洗馬吳

原隰望徙倚，松筠竟不移。隱憂慙萱樹，忘

懷待山卮

劉中書繪

初昕逸翮舉，日晏驚馬疲。幽山

有桂樹，歲暮方參差。

沈右率約

還塗臨渚

綠水纈清波，青山繡芳質。落景皎晚陰，殘花綺

餘日

何從事

白沙澹無際，青山眇如一。傷此物運

移，惆悵望還律。

吳郎

白水田外明，孤嶺松上出。卽

趣佳可淹，淹留非下秩。

府君遙和

紀功曹中園

蘭亭仰遠風，芳林接雲嶸。傾葉順清飈，脩莖伫

高鶴

何從事

連綿夕雲歸，暝暝日將落。寸陰不可

留，蘭墀豈停酌。

吳郎

丹纓猶照樹，綠筠方解籜。永

志能兩忘，卽賞謝邱壑。

府君

閒坐

雨洗花葉鮮，泉漫芳塘溢。藉此閒賦詩，聊用蕩

羈疾。

陳郎

霖霖微雨散，歲蕤蕙草密。預藉芳筵賞，

沾生信昭悉。

紀功曹晏

紫葵窗外舒，青荷池上出。旣

闔頰，川扉且臥淮。南秩

府君

流風蕩晚陰，行雲掩

朝日。余此蘭蕙客，徒有芳菲質。

何從事

侍筵西堂落日望鄉

沈病已綿緒，負官別鄉憂。高城淒夕吹，時見國烟浮。

曹丞

漠漠輕雲晚，颯颯高樹秋。鄉山不可望，

蘭卮且獻酬。

府君

旻高識氣迴，泉渟知滌收。幸遇

慶筵渥，方且沐恩猷。

紀功曹晏

芸黃先露早，騷瑟驚

暮秋。舊城望已肅，况乃客悠悠。

何從事

往敬亭路中

山中芳杜綠，江南蓮葉紫。芳年不共遊，淹留空若是。

府君

綠水豐漣漪，青山多繡綺。新條日向抽，

落花紛已委何從事弱萼既青翠輕莎方霍靡鷺

鷗沒而遊、麝麝騰復倚齊舉春岸望沈沈清流

見瀾瀾幸藉人外遊盤桓未能徙陳郎驚柅把瓊

芳隨山訪靈詭榮楯每嶙峋林堂多碣礧府君

祀敬亭山春雨

水府衆靈出石室寶圖開白雲帝鄉下行雨巫

山來府君歌風讚靈德舞蹈起輕埃高軒乍留吹

立羽或徘徊何從事福降羣仙下識逸百神該青

鳥飛層隙赤鯉沫瀾隈齊舉郎

此詩為古詩一首

五言古詩一首

七言古詩一首

五言古詩一首

七言古詩一首

五言古詩一首

七言古詩一首

五言古詩一首

七言古詩一首

本傳

謝朓字玄暉、陳郡陽夏人也、祖述吳興太守、父諱散騎侍郎、朓少好學、有美名、文章清麗、解褐豫章王太尉行參軍、遷隨王東中郎府、轉王儉衛軍東閣祭酒、太子舍人、隨王鎮西功曹、轉文學、子隆在荊州、好辭賦、數集僚友、朓以文才尤被賞愛、流連晤對、不捨日夕、長史王秀之以朓年少相動、密以啓聞、世祖敕曰、侍讀虞雲、自宜恒應侍接、朓可還都、朓道中爲詩寄西府曰、常

恐鷹隼擊。秋菊委嚴霜。寄言尉羅者。寥廓已高翔。遷新安王中軍記室。尋以本官兼尚書殿中郎。隆昌初。敕朏接北使。朏自以口訥。啓讓。見許。高宗輔政。以朏爲驃騎諮議領記室。掌霸府文筆。又掌中書詔誥。除秘書丞。未拜。仍轉中書郎。出爲宣城太守。以選復爲中書郎。建武四年。出爲晉安王鎮北諮議南東海太守。行南徐州事。啓王敬則反。謀上甚嘉賞之。遷尚書吏部郎。朏上表三讓。中書疑朏官未及讓。以問祭酒沈約。

約曰。宋元嘉中。范曄讓吏部。朱脩之讓黃門。蔡興宗讓中書。並三表詔荅。具事宛然。近世小官不讓。遂成恒俗。恐此有垂讓意。王藍田劉安西並貴重。初不自讓。今豈可慕此不讓邪。孫興公孔顗並讓記室。今豈可三署皆讓邪。謝吏部今授超階。讓別有意。豈開官之大小。擬讓之美。本出人情。若大官必讓。便與詣闕章表不異。例旣如此。謂都非疑。朏又啓讓。上優答不許。朏善草隸。長五言詩。沈約常云。二百年來無此詩也。敬

皇后遷祔山陵、眇撰哀策文、齊世莫有及者、東
昏失德、江祐欲立江夏王寶玄、未更回惑、與弟
祀密謂眇曰、江夏年少輕脫、不堪負荷神器、不
可復行廢立、始安年長八纂、不乖物望、非以此
要富貴、政是求安國家耳、暹光又遣親人劉渢
密致意於眇、欲以爲肺腑、眇自以受恩高宗、非
渢所言、不肯答、少曰、暹光以眇兼知衛尉事、眇
懼見引、卽以祐等謀告左興盛、興盛不敢發言、
祐聞、以告暹光、暹光大怒、乃稱勅召眇、仍回車

付廷尉、與徐孝嗣、拓暄等連名啓誅朏曰、謝朏資性險薄、大彰遠近、王敬則往構、凶逆、微有誠効、自爾昇擢、超越倫伍、而谿壑無厭、著於觸事、北遂扇動內外、處處姦說、妄貶乘輿、竊論宮禁、間謗親賢、輕議朝宰、醜言異計、非可具聞、無君之心、旣著、共棄之誅、宜及、臣等參議、宜下北里、肅正刑書、詔公等啓事如此、朏資性輕險、久彰物議、直以雕蟲、薄伎見齒、衣冠昔在渚宮、構扇蕃邸、日夜從諛、仰窺俯畫、及還京師、翻自宜露、

江漢無波。以爲已功。素論於茲。而盡縉紳所以側目。去夏之事。頗有微誠。賞擢曲加。踰邁倫序。感悅未聞。陵競彌著。遂復矯構風塵。妄惑朱紫。詆貶朝政。疑間親賢。巧言利口。見醜前志。涓流纖孽。作戒遠圖。宜有少正之刑。以申去害之義。便可收付廷尉。肅明國典。又使御史中丞范岫奏收朮下獄死。時年三十六。朮初告王敬則。敬則敬則女爲朮妻。常懷刀欲報朮。朮不敢相見。及爲吏部郎。沈昭畧謂朮曰。卿人地之美。無忝此職。

但恨今日刑于寡妻
眇臨敗歎曰我不殺王公
王公由我而死

謝宣城集終

攜宜與兼絲

則民去夏之事

故位未聞於

詔彰朝政


緘孽作戒

便可收

奏

王公由

外



31